



Dipoho di a iphetetsa



Mpho Motlhodiemang



Thusang! Thusang! “Dipoho di a nkgorohela”, ho hoeletsa Mookodi ka lentswe le phefa.





Maama ke monna wa morui. O na le dikgomo tse ngata. Ka hara tsona, ho na le dipoho tse pedi tse kgolo.



Maama o sebedisa dipoho tsa hae ho thothela batho metsi kwaana naheng. Maama o lemetse leoto. Ha a sa kgona ho isa dikgomo makgulong le metsing.





“Ahaa! Ke tla bua le Mookodi ho tla disa dikgomo tsa ka”, ho realo Maama. A bua le Mookodi ba dumellana.



Letsatsi le letsatsi Mookodi o ne a isa dikgomo naheng ho ya fula. Ere mantsiboya a di ise nokeng. Mookodi o ne a sa rate diphoofolo tsena, haholoholo dipoho.





Mookodi o ne a sotla dipoho. O ne a tsheha a be a pitike ha di sitwa ho phema kotsi. Ha di wela ka metsing o ne a sa di thuse. O ne a etsa ka boomo.



Ha dikgomo di boela hae, Mookodi o ne a betsa dipoho hore di mathe. O ne a di otlala ka matla. Dipoho di ne di sotlehile. Mookodi o ne a le pelo e mpe ruri.





Ha Mookodi a qeta ho kwalla dipoho ka lesakeng, a di fa furu. Ha a qeta a kwale monyako ka dithupa, a tsamaye.



Maama o ile a roma Mookodi ho ya thotha patsi naheng. Mookodi a nka kariki le dipoho, ke elwa a tsamaya.





Mookodi a palamisa kariki patsi e ngata ho feta tekano. Dipoho tsa hula ka thata ho ya hae. Mookodi a qala ho di otlala hore di mathe. Letsatsing leo, dipoho tsa sitwa le ho hula. Morwalo o ne o le boima.



Mookodi o ile a di halefela haholo: “Ha dihule! Di botswa ebile di etsa ka boomo.”
Mookodi o ne a sa di natse. Dipoho di ne di sa nwa metsi le ho fula.





Ha a fihla hae Mookodi a panolla dipoho. A kenya dipoho ka lesakeng jwalo ka mehla. A kwala monyako ka dithupa. Mookodi a ya hae.



Eitse ha Mookodi a furalla, dipoho tsa thula monyako. Dithupa tsa wela hole kwaana. Dipoho tsa mo kgorohela. Hwa thunya lerole, majwe a hasana hohle.





“Thusang! Thusang! Ke hlaselwa ke dipoho”.
Ho hoeletsa Mookodi a baleha. A potela ka
moaho wa kgale pela tsela, dipoho tsa mo
sala morao.



Mookodi a hopola ho ya ho Maama. Dipoho tsa mo sala morao. Mookodi a matha a shebile morao. A wela ka lengopeng. A bona dipoho di mo shebile.





Ha dipoho di qeta ho tloha ho yena, a matha la ntshwekge. Ebe o tla ya kae Mookodi? A tlelwa ke leano. A kopa baahisane ho kgannela diphoofolo lesakeng.



Mookodi a hlokomela hore dipoho ha di rate ka moo a di tshwarang ka teng. Ebe o tla etsa jwang? Mookodi a nka nkgo ya metsi le furu a tsamaya butle ho ya lesakeng. Dipoho tsa qala ho ja mme tsa kgora.





Mookodi a ema monyako a bua le dipoho ka boikokobetso le tlhompho. Ho tloha mohleng oo, a qala ho phela le diphoofolo hantle.



Mookodi a etsa dithuto tsa ho hlokomela diphoofolo. A ithuta tse ngata ka diphoofolo. Lerato la ho hlokomela diphoofolo la toota le ho feta. A theha mokgatlo wa ho sireletsa diphoofolo. A eletsa badisa ba bang ka tlhokomelo ya diphoofolo.

